

AWIG-AWIG

DESA ADAT KEPAON



Antuk :
KRAMA DESA ADAT KEPAON



Kemedalang Olih :
PRAJURU DESA ADAT KEPAON
Icaka Warsa 1906

PURWA KATA

Om Swastyastu,

Antuk panugrahan Ida Sang Hyang Pramakawi, penyuratan Awig-awig Desa Adat Kepaon puniki prasida memargi becik tur kemolihang paingkup bawos. Penyuratan awig-awig puniki medasar antuk Pararem Krama Desa Adat Kepaon duk parumannyo ring Pura Desa, rahina Redite-pon, wuku Medangsia, tahun Caka 1905, tanggal Masehi 22 Mei 1983. Duk paruman inucap, kepariangkenin mangda awig-awig Desa Adat Kepaon kasurat.

Kewentenan awig-awig ring sejeroning desa adat wantah mabuat pisan, santukan awig-awig puniki merupa sepat-siku² sane pacang koanggen titi-pengancan miwah sasuluh antuk Warga desane sami saha Prajuru ipun, ring sejeroning ngupadi kesukertan Desa miwah raga, sekala miwah niskala.

Ring awig-awig puniki keunggahang bantang-bantang sane mabuat kewanten, mangdaning kewentenan ipun ajeg. Mungguing penyahcah miwah carang uparenggan ipun, sane gelis nunjuk lungsur manut kewentenan Desane, patut keunggahang, ring Perarem miwah Paswara.

Akeh para manggala miwah semeton sane sewosan micayang bantuan, inggian bantuan arta utawi bantuan pemikirah², ring sajeroning nyurat awig-awig puniki. Titiang Bendesa Adat, pinaka wakil Krama Desa Adat Kepaon, ngaturang suksmaning manah ring sapa sira ugi sane sampun presida micayang bantuan inucap. Pamekas titiang ngaturang suksmaning manah ring Bapak Ketua BPPLA (Badan Pelaksana Pembina Lembaga Adat) Kabupaten Badung miwah Bapak I Wayan Koti Cantika, S.H. Saking, MPLA (Majelis Pembina Lembaga Adat) Propinsi Bali sane sampun presida ngaturang bakti nuntun penyuratan awig-awig puniki. Suksmaning manah titiang naler ketiba ring Bapak Sekretaris MPLA Propinsi Bali, sane sampun nguwehin bantuan arta (jinah) miwah piceket-piceket ring sajeroning nyurat awig-awig puniki.

Mogi-mogi Ida Hyang Parakawi mapaica penugrahan ring ida-dane inucap ring ajeng.

Om, Canti, Canti, Canti, Om...

Kepaon, Icala Warsa 1906
Bendesa Adat,

Drs. I Gede Sadia

-----sys-----

DAGING AWIG – AWIG

	Kaca
1. PURWA KATA	ii
2. DAGING AWIG-AWIG	iii
3. MURDA CITTA	1
4. SARGA I, Aran lan Wewidangan Desa.....	1
5. SARGA II, Petitis lan Pamikukuh	2
6. SARGA III, Sukerta Tata Pekraman	3
Palet 1, Indik Krama	3
Palet 2, Indik Prajuru.....	6
Palet 3, Indik Paruman	8
Palet 4, Indik Kulkul	10
Palet 5, Indik Padruwen Desa.....	12
Palet 6, Sukerta Pamitegep	13
7. SARGA IV, Sukerta Tata Agama.....	16
Palet 1, Indik Dewa Yadnya	16
Palet 2, Indik Resi Yadnya	18
Palet 3, Indik Pitra Yadnya	20
Palet 4, Indik Manusa Yadnya	21
Palet 5, Indik Bhuta Yadnya	22
8. SARGA V, Sukerta Tata Pawongan.....	23
Palet 1, Indik Pawiwahan.....	23
Palet 2, Indik Palas Merabian.....	25
Palet 3, Indik Sentana	26
Palet 4, Indik Warisan.....	27
9. SARGA VI, Wicara lan Pamidanda.....	29
Palet 1, Indik Wicara	29
Palet 2, Indik Pamidanda	30
10. SARGA VII, Nguwah-nguwuhin Awig-awig.....	31
11. SARGA VIII, Pemuput	32

AWIG – AWIG DESA ADAT KEPAON
MURDA - CITTA
AUM, OM

Om Swastyastu, Om awighamastu nama sidhyam,
putusing pasebhan Krama Desa ADAT KEPAON, gumawe Awig–awig
Desa maka sepat siku-siku pameneh, wastu kesidhan prayojanan mami kabeh,
prasama angidep mwah amanggehaken kadi lingin Awig–awig iki.

SARGA I
ARAN LAN WEWIDANGAN DESA

Pawos 1

- (1) Desa Adat puniki mewasta Desa Adat Kepaon
- (2) Jebar kakuwub wewidanganannya, mewates nyatur Desa
 1. Sisih Wetan : Subak Keredung
 2. Sisih Kidul : Segara Bwnoa
 3. Sisih Kulon : Subak Cuculan
 4. Sisih Lor : Desa Adat Pemogan
- (3) Kekuwub wewidangan Desane, manut dresta luwire :
 1. Pepulan karang pumahan, sinanggeh pelemahan Desa Pekraman.
 2. Setra, Sawah miwah tegai ring kakuwub wewidangan Desa sejabaning Palemahan Desa Pekraman manggeh telajakan Desa.

Pawos 2

- (1) Desa Adat Kepaon ke pah dados 8 Banjar, luwire :
 1. Banjar Dalem
 2. Banjar Dalem Kesumasari
 3. Banjar Jaba – Tengah
 4. Banjar Jaba – Jati
 5. Banjar Dukuh Tangkas
 6. Banjar Sakah
 7. Banjar Rangkan Sari
 8. Banjar Kajeng
- (2) Wates wewidangan pelemahan Banjare kemanggehang antuk paruman Desane.

- (3) Anut ring manjuk lungsur cacah jiwa pawongannya pahan2 Banjar rawuhing wates wewidangannya wenang robah manut pamutus paruman Desa.
- (4) Banjare patut madruwe piranti2 pamokasnya Bale Banjar miwah kulkul.
- (5) Banjare wenang ke pah dados tempekan manut perarem Banjar.

Pawos 3

- (1) Banjare wenang ngardi awig-awig miwah perarem-perarem maka pamikukuhnya.
- (2) Awig-awig miwah pararem Banjar tan wenang lempas ring Awig-awig miwah pararem2 Desane, saha teher kalingga tanganin antuk Bendesa Adat, maka pamikukuh dumugi dados lumaksana.
- (3) Sehanan tempekan tan wenang ngardi Awig-awig miwah pararem, santukan tempekan komon mawak pahan, sinanggeh tangan sukuning Banjar.

SARGA II

PETITIS LAN PAMIKUKUH

Pawos 4

Desa Adat Kepaon ngemanggehang pamikukuh :

1. Pancasila
2. Tri hita krana
3. U.U.D. 1945 pamekas pasal 18

Pawos 5

Luwir petitis Desa Adat Kepaon :

1. Mikukuh miwah ngajegang Sang Hyang Agama
2. Nginggiling tata-prewertine megama
3. Ngajegang kasukertan Desa saha pawongannya sami, sekala-niskala
4. Ngajegang tata sangaskaraning pawongan, pamekas sane ngiket pakulawargan
5. Ngajegang kasukertan saraja druwening Desa miwah druwening pawongannya sami

SARGA III
SUKERTA TATA PAKRAMAN
Palet 1

Indik Krama Pawos 6

- (1) Sehanan sang jenek mapumahan ring Desa Adat Kepaon sinanggeh warga Desa Adat Kepaon.
- (2) Warga Desa inucap linggihnya wenten 2 soroh :
 1. Warga sane magama Hindu tur ngeranjing mekrama sinanggeh Krama Desa
 2. Sejaba punika sinanggeh tamiu

Pawos 7

- (1) Sehanan warga Desa sane sampun merabian patut ngawit tedun me Krama
- (2) Satunggal Krama manut karendahan/kula wargannya patut kena ayah, sinalih tunggil :
 1. Ayah ngarep utawi
 2. Ayah – balu
- (3) Ayah ngarep sane sampun wenten sentanannya merabian, wenang Nyada ayahannyane keselidihinin olih Sentanannya inucap.

Pawos 8

- (1) Keluarga megama Hindu wiwitan warga–deaa seosan, wenang ngoranjing me–Krama Desa, prade pacang jenek mapumahan ring wewidangan kekuwub Desa Adat Kepaon.
- (2) Sang ayat ngeranjing kadi ring ajeng atur supeksa ring Kelihan Banjar sane ngewidangan genah pumahannya. Atur inucap ring ajeng keduluran antuk ilikita saking Banjar/Desa wiwitannya ngenenin indik paukudnya saha nahur linggih manut perarem Banjar utawi Desane.

Pawos 9

- (1) Sehanan warga–Desa sane sampun anom miwah dehe, soang–soang patut ngayah, kewastanin ayah teruna (sane lanang) miwah ayah Dehe (sane istri).
- (2) Ayah teruna miwah dehe puniki kepupulang ring sekehe teruna miwah sekehe dehe.
- (3) Sekehe–sekehe puniki kupah manut kebanjaran.

Pawos 10

- (1) Desa miwah Banjare mepaweh leluputan Ayah utawi pekenan² ring sang inggiling linggih utawi sang kawelas – asih.
- (2) Sor – singgih leluputanne miwah bacakan sang luput keuanggahang ring perarem.
- (3) Sejabanin Prajuru Desa, sane pastika patut polih leluputan pamekasnya :
 1. Para Sedaka
 2. Para Pemangku Kahyangan Desa
 3. Sang sakit tahunan
 4. Wang cendangga banget 3
 5. Wang alit ubuh.

Pawos 11

- (1) Swadharmaning Krania Desane Luwire :
 1. Drada atuang ring Desa
 2. Tinut saturut ring sedaging Awig – awig , Pararem² miwah paguwet-paguwet Desa sewosan.
 3. Tan maren ngutsahayang mangda Desane nyidayang nyujur tatujonnya kadi mungguh ring pawos 5 ring ajeng.
 4. Natak panes–tis kertin Desane
- (2) Wang, Desa sinanggeh tamiu patut :
 1. Tinut ring tetiwak Desane nganinin indik ngupadi sukertan Desane ring sekala
 2. Tan wenton nungkasin kertin Desane

Pawos 12

- (1) Petiyas Krana Desa luwire wenang polih pangayom Prajuru manut dresta nganinin :
 1. Sangaskara kauriprnnya sane mabuat, sane mastikayang iketan sulur pakula wargan
 2. Kasukertan miwah kesucian dewek, parhyangan miwah karangnyane
 3. Kasukertan druwenyane soang-soang
 4. Kabawosin tur katiwakin pamutus sehanan wicarannya.
- (2) Sehanan warga Desa rawuhing sang sinanggeh tamiu wenang polih pesayuban ngemanggehang kasukertan raga, Agama sehe druwenyane soang-soang.

Pawos 13

- (1) Sehanan Krama sane ngerobang utawi ngajak anak sewosan, lempas ring drestaning pakula wargan upami :
 1. Ngajak wang duduk dudukan
 2. Nyama mulih saking makurehan
 3. Jadma masundulang dewek
 4. Rowang pastika jenek miwah sane sawosan, patut atur uning ring KelihanBanjarnya
- (2) Pesadok ring ajeng keduluran antuk keterangan pastika, nganinin linggih, harta brama niwah tateganah Kramane kalih sang kajak inucap.
- (3) Kramane sane ngeroban/ngajak patut tanggung suma kuta negenang lampah sang keajakarepe ring kasukertan Banjar utawi Desane.
- (4) Kelihan Banjare ngunggahang pesadok punika ring ilikitannya, saha nyiarang ring paruman Banjare.

Pawos 14

- (1) Krama sane nampi tamiu jantos makolem, patut mesadok ring Kelihan Banjarnya.
- (2) Prade tamiune pacang–madunungan jantos langkungan ring auku, I Kelihan patut nureksain pisan mungguing makebuatannya miwah surat–surat keterangan.
- (3) Bilih-bilih yan pacang madunungan jantos sasihan utawi tahunan swennya, patut keunggahang ring ilikitan Banjar, tur dunungah inucap patut sareng nedunin masuka duka bhaya–pati.

Pawos 15

- (1) Tedun me–Krama kalih ngetang parobahan sehanan ayahan, ngawitin nangken Galungan, sejawinin nganinin ayah–balu kaetang premangkin.
- (2) Sehanan wusan me-Krama kaetang premangkin
- (3) Nangken ayatan panemaya inucap (Galungan) Kelihan Banjar soang–soang ngewantunin nyacah jiwa, ngetangan kalih mastikayang pe-Krama miwah ayah–ayahan kadi ring ajeng (1) ring wewidangaunya soang–soang.
- (4) Kepastian cacah jiwa, indik pekraman miwah ayah–ayahan kapikukuhin antuk pamutus paruman Banjar soang-soang dumugi kengin laksanayang.
- (5) Kepastikayang inucap digelis kesuratan ring iliki tan (pipil utawi kartu) Krama.

Pawos 16

- (1) Sinalih tunggiling kula warga wusan me-Krama Desa, prade kula warga inucap :
 1. Megingsir linggih saking wewidangan Desa Adat Kepaon, Sang wusan me-Krama sangkaning megingsir linggih patut nunas bebebaskan tur ilikita pastika saking Prajuru Banjar utawi Desa
 2. Ke-noreyang antuk Desane, risampun mejalaran papuikan selami 3 warsa tur taler tan peresida ngesehin solah maprewerti
- (2) Sulur tur tata ngenoreyang :
 1. Pastika wenten sudosanipun
 2. Tan tinut ring pituduh Prajuru indik nyupat raga ngesehin solah meprewerti
 3. Katiwakan pamidanda norane antuk paruman Desa risampun kepastika antuk saksi, ilikita, bukti antuk Bendesa Adat
 4. Pamidanda ngenoreyang inucap keatur ring Pemerintah
- (3) Sang wusan me-Krama tan wenten polih pah-pahan sangkaning druwen Desa Utawi Banjar.
- (4) Desane wusan mepaweh pesayuban kasukertan sekeluwire, arep ring sang kanoreyang
- (5) Banjar2 se sejabagan Dosa Adat Kepaon tan wenang nampi wang kenoreyang
- (6) Sang kenoreyang inucaning ajeng kengin keteduning malih me-Krama meduluran antuk nutug ayah-utawi nahur linggih (batu2) sepatut ipun

Palet 2

Indik Prajuru

Pawos 17

- (1) Desa Adat puniki kaenterang olih Bendesa Adat
- (2) Banjar miwah tempekan keanter antuk Kelihan Banjar miwah Kelihan tempek nungga-nunggal
- (3) Bendesa Adat, Kelihan Banjar miwah Kelihan tempekan keadegang melarapan antuk pemilihan olih parumannya soang-soang, nyabran 5 warsa
- (4) Sehanan Kelihan patut mewiwit Krama ayahan Ngarep.

Pawos 18

- (1) Bendesa Adat mwah Kelihan Banjar, soang–soang kwsanggra antuk :
 1. Pangliman pinaka wakil
 2. Penyarikan pinaka juru tulis
 3. Pesedahan pinaka pengemong druwen Dosa
 4. Kesinoman pinaka juru arah.
- (2) Wewidangan penyanggranw medudonan anut ring akeh kedik Krama gegambelan miwah pekaryane
- (3) Prajuru inucap ring ajeng (1) kejudi olih Kelihanyane soang–soang.

Pawos 19

- (1) Swadharman Bendesa Adat miwah Kelihan Banjar soang–soang luwire :
 1. Ngenterang paruman–paruman Desa/Banjar
 2. Ngenterang penglaksanaan sedaging awig–awig, Perarem2, Pesuara2 lsp.
 3. Ngeraksa saha ngatur tatane ngangge seraja–brana druwen Desa/Banjar
 4. Nuntun tur ngenterang Krama rahuing warga Desane ngupadi kesukertan sekala–niskala
 5. Nuntun saha nyaksinin tata–cara miwah sangaskaraning kauripang mabuat, sane ngilitang sulur pekulawargan
 6. Nuntun saha ngenterang iwarga Desa/Banjar ngupadi nginggilang Sang Hyang Agama, kesucian Kahyangan, kahyangan, kesucian pawongan, kesucian Pelemahan, miwah tata–caraning nganggo Setra
 7. Mawosin kalih niwakang pamutus marep ring wicaran Desane/Banjar
 8. Ngewakilin Desa utawi Banjarnyane mete–muang bawos ring sapesire ugi
 9. Miwah sane siwosan manut dresta.
- (2) Tata–cara ngelaksanayang swadharman ring ajeng, tan maren patut anut ring daging awig–awig, perarem, dresta miwah pemutus–pemutus paruman Desa utawi Banjar
- (3) Penglaksana ring ajeng patut kasiarang ring Paruman Desa utawi Banjar kapungkur ipun
- (4) Bendesa Adat miwah KeLihan Banjar, sumakuta natak pemutus Paruman Desa utawi Banjar ngananin penglaksanaan swadharmania soang–soang.

Pawos 20

- (1) Ulihan2 Bendesa Adat miwah Kelihan Banjare, luwire :
1. Upon-upon tanah pecatu
 2. Leluputan saking pekenan-pekenan
 3. Miwah ulih – ulihan sewosan manut perarem Desa utawi Banjar.

Pawos 21

- (1) Swadharman Prajuru2 ne sewosan wantah nyanggra nyerayanin Bendesa Adat, utawi Kelihan Banjar soang-soang manut dudonan
- (2) Ulih-ulihan Prejuru inucap manut, kadi daging Perareman Desa utawi Banjar manut dudonan.

Pawos 22

- (1) Bendesa Adat miwah Kelihan 'Banjar ring sejeroning ngelaksanayang swadhamannya patut mewirasa ring para Pangelingsir, pamekas rikala – wenten pekewuh ring Desa utawi Banjar.
- (2) Pangelingsir inucap kawenangan mapeweh bawos pinaka tetimbang ring Bendesa Adat utawi Kelihan Banjar yadiastu tan kawidi.
- (3) Mungguwing pawilangan para Pangelingsir Desa Adat manut makweh Banjar pinaka dutta soang-soang Banjar
- (4) Makweh pawilangan Panglingsir Banjar manut paitang miwah kawigunan soang-soang pabanjaran
- (5) Pangelingsir ring ajeng kesudi antuk paruman Desa utawi Banjar nyabran limang warsa tur kangkat kasudi malih sejawaning wenten parindikan seos

Palet 3

Indik Paruraan

Pawos 23

- (1) Luwir paruman sane wenten ring Desa :
1. Paruman Desa
 2. Paruman Banjar
 3. Paruman Prajuru Desa
 4. Paruman Sekehe Teruna utawi Dehe
- (2) Sehanan Paruman sida lumaksana yan sampun ketedunin antuk sang patut nyarengin, majalaran suaran kulkul saha abusana nyelempot manut dresta

- (3) Sehanan pamutus kautsahayang pisan mangda malarapan antuk suara gilik–seguluk utawi beriuksiu bilih tan prasida suara makehan sinanggeh pamutus
- (4) Ring sehanan paruman tan maren kemanggalain antuk Pangarcana ring Ida Bhagawan Penyarikan maka sarana widhi–wedana utawi Cane.

Pawos 24

- (1) Sehanan ayah–ngarep miwah ayah–balu, patutnyarengin Paruman Desa miwah Banjar, saha wenang mastikayang pamutus
- (2) Sehanan ayah sewosan (ayah Dehe/Teruna) wenang nyarengin paruman nanging tan wenang mastikayang pamutus.

Pawos 25

- (1) Paruman Desa Adat kewentenang sanistane 6 (enam) sasih sepisan, nemoning Galungan.
- (2) Luwir Paruman Banjar kewentenan nyabran asasih manut dresta
- (3) Nangken paruman ring ajeng, Bendesa Adat utawi Kelihan Banjar patut nyiaran pemarginia ngenterang Desa utawi Banjar, pamekas nganinin indik :
 1. Munjuk lungsuring pekraman utawi ayah–ayahan
 2. Pemargin panelas miwah sulur arta brana druwen Desa utawi Banjar
 3. Pemargin usaha–usaha Desa/Banjar sane mabuat
 4. Sehanan wicara saha pamutus–pamutusnia
 5. Daging perarem–perarem miwah pasuara–pasuara sane mabuat
 6. Rencana Prajuru nganinin usaha Desane/Banjar kapungkur
 7. Miwah sane sewosan
- (4) Sehanan siaran ring ajeng katitenin saha katiwakan pamutus antuk paruman Desane/Banjare
- (5) Pamutus parunan inucap ring ajeng, sinanggeh sepat siku–siku, patut katinutin antuk warga Desa/Banjar sami, pamekas antuk Prajuru.

Pawos 26

- (1) Sejaba kadi mungguh ring ajeng, paruman Desa patut kawentenang prade kawidi olih krama Desa sanistane sareng 3 (tigang) Banjar
- (2) Sang ngewidi patut mastikayang bantang sane sandang bawosan ring paruman inucap

- (3) Paruman Desa inucap taler katiwakan pamutus manut kadi mungghah ring ajeng.

Pawos 27

- (1) Paruman Desa miwah Banjar patut ngemedalang pararem–pararem, anggen mitegepin Awig–awignia nungga–nunggal manut dudonan
- (2) Daging seharian pararem patutsaeloan ring Awig–awig
- (3) Sane patut kaunggahang ring pararem makadinia :
 1. Dewasa ngawitin pamargin bantang daging Awig–awig sane mabuat
 2. Rerincikan panyacah daging Awig–awig sane mabuat
 3. Agung alit danda, panikel–panikelnia, lsp
 4. Tata sulur ngemargiang daging Awig–awig
 5. Miwah sehanan indik sewosan anggen mitegepin daging Awig–awig.
- (4) Paruman Desa wantah sinanggeh pangawisesa sane wenang nyelem putihang tata pangenter Desa manut dresta.

Pawos 28

- (1) Paruman Prajuru Desa Adat patut kawentehang senistane ngesasih sepisan
- (2) Paruman inucap katuntun antuk Bendesa Adat
- (3) Sehanan Prajuru Desa wenang tur patut nyarengin Paruman Prajuru Desa
- (4) Paruman Prajuru Desa kawenangan wantah ngerincikan tata– upaya ngelaksanayang usaha miwah pangerencana sakaluwire
- (5) Sehanan rerancangan, bilin–bilih rencana sane pacang niwakin tetegenan ring ikrama, tan wenang kelaksanayang sedereng kapikukuhin antuk pararem Desa Utawi Banjar manut dudonan

Pawos 29

- (1) Paruman Prajuru wenang ngamedalang pasuara–pasuara anggen mitegepin daging Awig–awig Desa
- (2) Daging pasuara tan maren patut :
 1. Saeloan ring daging Awig–awig
 2. Manut ring Agama, miwah dresta
 3. Pastika nyantenang agung alit pamidandanya yan kapurug

Palet 4

Indik Kukul

Pawos 30

- (1) Kukul Desa miwah Banjar^{2e} tan wenang ketepak yan tan manut kadi daging Awig–awig puniki
- (2) Tabuh tetepakan kukul Banjar^{2e} pastika mesewosan manut tetujonna, luwire :
 1. Tengeran upakara Yadnyan Desa utawi Banjar
 2. Tengeran wenten sinalih tunggil warga Desa Sane sede/padem
 3. Tengeran wenten sinalih tunggil warga–desa sane mewiwaha, istri/lanang ;
 4. Tengeran wenten sinalih tunggil warga–desa medruwe oka
 5. Tengeran ngawit ngelaksanayang pekaryan kadi sampun kearahang utawi kesiyarang ;
 6. Tengeran sangkep Banjar
 7. Tengeran ngurungan ngelaksanayang pekaryan ;
 8. Tengeran wenten wang kepelegendang ;
 9. Tengeran wenten sinalih tunggil wang desa kemalingan ;
 10. Tengeran wenten wong desa keamuk, begal utawi kabaak/baya pati sewosan
 11. Tengeran sewosan manut dresta
- (3) Kukul desane tan wenang ketepak sejawining mula wantah tengerane patut ketiwakang ring wong–desane sami, upami Yadnyan Desa, Paruman/pekaryan wong Desa sagrehan miwah baya–pati.

Pawos 31

- (1) Kukul Desa miwah Banjare tan wenang ketepak yan tan sangkaning bebebasan utawi petuduh Bendesa/ Kelihan Banjar soang–soang manut dudonan sejawaning rikala ngawentenang tengeran nganinin kepanca bhayan
- (2) Sehanan kukul Banjar sewewidangan Desa Adat Kepaon puniki, patut nyarengin ketepak, prade wenten sinalih tunggil kukul Banjar/Desa nyihnyayang wenten amuk/baya–pati
- (3) Sang nepak tan sangkaning petuduh, patut, digelis atur supeksa ring Kelihan maka buatan panepakane kadi ring ajeng
- (4) Suaran kukul Sekehe² sakaluwire ring Desa Adat Kepaon tan wenang nyawerin suaran kukul Desa miwah Banjar

Pawos 32

- (1) Suaran kulkul tengeran pekaryan patut ketedunin antuk ayahan manut daging dedawuhan utawi siarane
- (2) Suaran kulkul tengeran baya patut-ketedunin antuk sehanan ayah lanang ngarep rawuhing ayah teruna saha, gegawan pamitulung anut rupan bayane.

Palet 5

Indik Padruwen Desa

Pawos 33

- (1) Padruwen Desa Adat Kepaon sane merupa pura luwire Bale Agung, Pura Desa, Pura Puseh, Pura Dalem, Penataran Dukuh, miwah Pura Dalem Penataran Suwung
- (2) Bale Agung, Pura Desa miwah Pura Puseh keemong antuk samian Banjar sewewidangan Desa Adat Kepaon
- (3) Pura Dalem Penataran Dukuh keemong antuk Banjar Dalem, Banjar Dalem Kesumasari, Banjar Jaba Tengah, Banjar Jaba Jati, tur Banjar Dukuh Tangkas.
- (4) Pura Dalem Penataran Suwung keemong antuk Banjar Sakah, Banjar Rangkan Sari tur Banjar Kajeng.

Pawos 34

- (1) Munjuk lungsuring padruwen Desa sane merupa tanah Pelaba pura miwah tanah sewosan patut pastika keilikitayang
- (2) Kewigunan tanah pelaba Pura miwah tanah sewosan kedabdab antuk Paruman Desa manut petitis Desane.

Pawos 35

- (1) Padruwen Desa Adat Kepaon sane marupa Setra luwire ;
Setra Gede, Setra Rare, miwah Setra Suwung
- (2) Setra Gede miwah Setra Rare keemong antuk Banjar Dalem, Banjar Dalem Kesumasari, Banjar Jaba Tengah, Banjar Jabajati, tur Banjar Dukuh Tangkas
- (3) Setra Gede keanggen mendem sawan wong duhur tur Setra Rare keanggen mendem sawan wong rare

- (4) Setra Suwung keomong antuk Banjar Sakah, Banjar Rangkansari, miwah Banjar Kajeng turkeanggen mendem sawe inggian wong duhur utawi wong rare.

Palet 6

Sukerta Pamitegep

Kaping 1

Karang, Wewangunan lan Pepayonan

Pawos 36

- (1) Sehanan karang pumahan patut :
1. Pastika wenten wates ipun
 2. Mepemedal kerurung utawi kemargine (ban wenten kebebeng)
- (2) Bendesa Adat patut ngutsahayang mangda karange kadi ring ajeng kewentenan ipun.

Pawos 37

- (1) Sehanan Krama patut ngwatesin karangyanne soang–soang jantos sidha trepti nyatur Desa
- (2) Wates karange sane mejapitan, patut ketegen olih kramane sane mehuluan kewates inucap
- (3) Taru miwah ulih2an sane maurip ring wates kedruwe olih Krama sane negen inucap
- (4) Sehanan Krama yan pacang ngewangun patut nganutin asta kosala kosali miwah asta bhumi, sanistane petitis niskala.

Pawos 38

- (1) Tan wenang makta/ngenahang bareng sane ngeletehin karang pumahan bilih2 yan keletehane ngelantur sinanggeh ngelimbak ngeletehin Desa manut Agama.

Pawos 39

- (1) Tanem tuwuh, tetangunan sakeluwire miwah tata ngangge karang tan wenang nahonin miwah ngawanang pocol utawi ngeletehin karang penyandingnya.
- (2) Prade wenten sapunika, wenang kesepat gantunganin utawi katiwakin pamidanda sewosan

- (3) Tanem tuwuh miwah tetangunan sane mebaya ring penyandingnya, penyepat gantunge wenang maren adepa-agung ngajeroang saking wates.

Kaping 2

Wewalungan

Pawos 40

- (1) Sehanan warga Desa sane miara sakeluir wewalungan patut sayaga nitenin negul utawi nglogorin mangda ubuhannya tan wenten ngerusakin karang utawi abian anak sewosan, bilih2 mangda sampunang jantos ngeranjing/ngeletehin Kahyangan

- (2) Prade wenten wewalungan ngeleb saha ngeranjingin Pekarangan sewosan sang medruwe karang patut melungguhang ring sang neruwenang wewalungane.

Bilih yan ngawanang eenten karusakan, kedulurin antuk nunasang bawos ring Kelihannya, mangda katiwakan pamidanda agung alit manut doedosane

- (3) Bilih ring asasih jantos ping tiga sampun malungguhang wewalungane wenang ketaban. Penaban punika patut uningang ring Kelihan Banjare
- (4) Wewalungan tetaban inucap enang ketebus olih sang druwenang. Agung alit penebusa katiwakang antuk Kelihan Banjar, kadulurin danda manut karusakane sane kawetuang.
- (5) Bilih ring asasih jantos ping tiga mateban kadi ring ajeng wewalungane wenang keambil tan tebusan Pemargine naban punika melarapan antuk bebebaskan Kelihan Banjar.

Pawos 41

- (1) Prade wewalungane sane ngeleb ngeranjing Kekahyangan, sang madruwe wenang kesisipang antuk danda prebyaning upakara pamarisudha sepatute
- (2) Tata-carane melungguhang, naban miwah nebas pateh kadi munggah ring ajeng.

Kaping 3

Dusta lan Baya

Pawos 42

- (1) Seharian warga-Desa prade uning ring wentene jadma melaksana dusta, patut digelis utawi pramangkin atur uning ring Prajuru

- (2) Laksanane sane sinanggeh dusta miwah baya kocaping ajeng luwire bacakanipun :
1. Jiwa – Bhaya
 2. Artha – Bhaya
 3. Goni – Bhaya
 4. Pelegandangan pemekas
 5. Duracara ring Agama
- (3) Bilih mabuat kawentenan ipun, sang uning inucap patut digelis nyuarayang kulkul Banjar anut ring rupan pengelaksanaan dustane.

Pawos 43

- (1) Sehanan warga–desa prade uning ring kawentenan bhaya utawi penangkan bhaya, patut pramangkin atur uning ring Prejuru
- (2) Bilih mebuat kawentenan ipun, sang uning patut digelis nyuarayang kulkul Banjar
- (3) Bhaya utawi penangkan bhaya mungguh ring ajeng, upaminnya:
Umah puwun, belabar 1sp.

Pawos 44

- (1) Warga–Desa sane keicalan/kemalingen, prade pacang maseserep, patut nunas bebebasan miwah penuntun ring Kelihan Banjarnya.
- (2) Prade genahe meseserep ngelangkungin Banjar sewosan, patut nunas bebebasan utawi uwak²an ring Kelihan Banjar irika.
- (3) Kelihan inucap ngicening penuntun, mangda tata–carahe meseserep manut kadi dresta.

Pawos 45

- (1) Sehanan warga– Desa prade pulih nuduk barang sakeluwire sewewidangan Desa Adat Kapaon, patut atur uning ring Kelihan Banjarnya
- (2) Kelihan inucap nyiarang barang dedudukan punika, mangda sang madruwe sidha newantun ngemolihang barangnyane. Sang mari–angkenin patut nyidayang nerangan/minasang, mungguwing barang punika mula wantah padruwennya
- (3) Prade jantos 3 sasih tan wenten jatma ngelingin, wenang kedruwe antuk sang nuduk

Kaping 4
Penyanggran Banjar
Pawos 46

- (1) Pekaryan druwen sinalih-tunggil Krama sane mabuat tata penyanggrannya kasukserahan ring Banjarnya soang-soang
- (2) Banjar wenang ngardi awig–awig ngemanggehang tata carane nyanggra pekaryan Kramane munggah ring ajeng
- (3) Penyanggrane patut mudarsana antuk arsa parama–tulung ring sang mekarya, nanging tan maren meteketing Kramane ring Banjar miwah Desa.
- (4) Bilih karyane dahat, bobot, Banjare wenang ngeruruh penampih ring Banjar sewosan.
- (5) Pekaryan sane patut kesukserahan ring penyanggran Banjare luwire :
 1. Ngupakara sawa jantos pangabenan yudiastu tan pesawa
 2. Sehanan Yadnya sewosan
 3. Pekaryan sewosan manut awig–awig Banjar, upami ngisidang sekaluwir beangunan/bale, jineng 1sp.

Pawos 47

- (1) Awig–awig Banjar ring ajeng, tan kengin kelaksanayang sedurung kececirenin antuk Bendesa Adat
- (2) Daging awig–awig inucap patut tan maren ngadungan mungguwing wibuh kincit pekaryane ring agung alit penyambaman ring Banjar.

SARGA IV
SUKERTA TATA AGAMA

Palet 1
Indik Dewa Yadnya

Pawos 48

- (1) Kahyangan² sane eenten ring wewidangan Desa Adat Kepaon, 2 soroh kewentenan ipun luwire :
 1. Penyiwian Desa (Kahyangan Tiga)
 2. Penyiwin Pemaksan² sewosan
- (2) Rahina piodalan ring pura sane sinanggeh penyiwian Desa luwire :
 1. Pura Desa/Bale Agung nemoning rahina Redite, Paing wuku Sinta
 2. Pura Puseh nemoning rahina Redite paing wuku sinta

3. Pura Dalem Penataran nemoning rahina Redite, Paing wuku sinta
- (3) Prajuru patut mastikayang indik piodalan miwah aci² Kahyangan Desane agung–alit miwah tata penglaksanannya.

Pawos 49

- (1) Prajuru patut mastikayang pemangku²ne sane kengin munggah tedun ring pelinggih² Kahyangan Desane, miwah ngiyasin pralinggannyane.
- (2) Sejabaning sang kepastikayang kadi ring ajeng, sapa sira ugi tan dados munggah ring pelinggih² miwah ngambil prelinggan Kahyangan Desane.
- (3) Taler patut kepastikayang indik sang wenang nyanggra tapakan² utawi ilen² sane patut pingitin kesuciannya(barong, ragda, lsp.).
- (4) Pemangku² Kahyangan Desane kesangaskara/kawintenin antuk Desane sapunika taler upakara pitreyadnyane ring sedannya kepungkur.
- (5) Prajurune tan maren nureksa– nitenin mangda I Pemangku ajeg nganutin sesanannya, dumugi tegeg keeninggannya, saha kepastikayang ulih²nya.

Pawos 50

- (1) Prajuru nuntun mangda sebanen upakara Desa pekraman siddha kemanggehang saka–siddhan, agung– alit anutang ring kewentenannya upami : Ngusaba Desa, Ngusaba Nini lsp.
- (2) Prade wenten cihna kedurmangalan jagat, Prajurune digelis ngutsehayang penarisuddha nunasang ring sang sadaka.

Pawos 51

- (1) Prajuru patut nuntun Krama Desa ngemanggehang kesucian Kahyangan Desane.
- (2) Bacakan letuh cendalane sane tan dados ngeranjing ring Kahyangan Desane luwire :
1. Jadma luh sebel–kandel sakeluwire (ngrajaswala, medruwe oka, karuron) manut sengker.
 2. Jadma cuntaka sangkaning kepademan.
 3. Sehanan jadma petika (panak bebinjat, wang beling/kesenggaman tan sinangaskara, wang memitra ngalang, wang sakit ila, jadma buduh miwah cendala² sewosan) sedurung kelukat keprayasita manut Agama.
 4. Jadma kepastikayang panten antuk Prajuru

5. Sato Agung ngawit bawi ngagengan, sejawaning kala Mepepada.
 6. Sehanan barang sane sinanggeh leteh manut Agama (Tulang/getih/ bok/ sekeluwire wiwitan watang, layudan pitra Yadnya lsp).
 7. Miwah sehanan candala sewosan.
- (3) Ring Kahyangan tan wenang ngelaksanayan sehanan laksana sane ngeletuhin upami :
1. Memisuh kalih wak purusya sewosan
 2. Mejaljal/megerengan, bilih2 yan jantos kanin/ metu rah.
 3. Mekobetan, mewarih, mesanggama, miwah prewertine ala sewosan.

Pawos 52

- (1) Kramane sane memanggili mungguwing wenten jadma ngeletuhin Kahyangan utawi pracihna kedurmangalaning jagat kadi nungguh ring ajeng, patut atur uning ring Prajuru.
- (2) Prade tan wenten nyadokang, wenang kesisipang sinanggeh seruron ring corah.

Pawos 53

- (1) Kahyangan penyiwian pemaksan2 sewosan, tata-cara ngastitiang kesuciannya, patut saeloan ring Kahyangan Desane, sejawining sane kerihinan madruwe dresta sewosan.
- (2) Yan tan manut kadi mungguh ring ajeng, pralingga Kahyangan inucap : tan dados kosarengan rikal nyejer ring Bale Agung kalaning Pengesangan, Pengusaban niwah upakara2 sewosan.

Palet 2

Indik Resi Yadnya
(Kawikon/Guru Loka)

Pawos 54

- (1) Sang pacang mepudgala/dwijati, sejawaning nunas panugrahan ring sang rumawos (Parisada utawi Pemerintah), taler patut mesadok ring Kelihan Banjar miwah Bendesa Adat.
- (2) Prajuru2 Desa inucap patut Bareng nureksa nitenin, mangda sulur kalih pemargine jati2 manut ring kecaping Agama, sane patut katureksa pinih ajeng kacedangan miwah kasucian riwayat hidup

- (3) Prade wenten sinanggeh kantong kamer, Prajuru inucap patut atur uning ring sang rumawos, mangda panugrahan sang rumawos siddha jati² manut ring kekecap Agama.
- (4) Prajuru Desane inucap taler patut Bareng nyaksinin pemargin upakarane.
- (5) Sapupute, Prajuru Desane patut digelis ngutsahayang mangda parab sang diniksan ring sehanan ilikita kegentos antuk biseka kawikon manut panugrahan nabennya, saha nyiarang ring paruman Banjar miwah paruman Desane.
- (6) Upakara ngelinggihang-pujane kapungkur taler-patut kesaksinin, saha kesiarang sepatutnya ring paruman Banjar miwah Desane.

Pawos 55

- (1) Prajuru patut nuntun saha ngemanggalain Krama Desane ngawas nitenin sapamargin para-wikune ring wewidangannya, pemuat mikukuhin kasucian linggih Ida.
- (2) Prajuru/pamekas Bendesa Adat, patut digelis atur uning ring Nabennya, prade wenten kacihnan wiku sasaring laksana
- (3) Atur piuning ring ajeng patut kedulurin cihna anut Tri-premana (Bukti-ilikita-saksi).
- (4) Daging pemutus-bawos sane katiwakang antuk Nabennya digelis kesiarang ring Paruman Banjar miwah Desane
- (5) Prade pamutus tatiwake ring ajeng kapineh durung siddha tinas-apadang Prajurune atur sepeksa ring sang rumawos (Parisada/Pemerintah) .
- (6) Pamutus tetiwak Nabe sane sampun kesanggra antuk sang rumawos inucap sinanggeh pamutus pastika tan kawicaran muwah.
- (7) Prajurune tan wenang lumaksane matetiwak ring sang meraga wiku.

Pawos 56

- (1) Sang pacang mawinten/pudgala makebuatan pacang memargi ngemangkunin, Nyontong, kebyan, dalang sakeluwire pacang ngenterang Yadnya, patut mesadok ring Kelihan Banjar miwah Bendesa Adat.
- (2) Prajuru² inucap patut ngawas nitenin mangda pemargine manut ring kekecap miwah drestane
- (3) Prajuru Desane wenang nawang-ngalangin, prade kecihnan sasar kekecap utawi drestane

- (4) Sang tan terima ring tetiwak Prajuru inucap, dados nunas pematut ring sang rumawos (Parisada/Pemerintah)
- (5) Pamutus bawos sane ketiwakang antuk rumawos ring ajeng singgeh pamutus pastika, tan kawicaranen
- (6) Prajuru² Desane patut sareng nyaksinin, upakara sang mawinten, sapupute, patut digelis kasiarang ring paruman Banjar miwah Desa, tegep rawuning wates kawenangan penganter Yadnya sane dados kemargiang manut penugrahan Dang Guru/drestanye soang–soang.

Pawos 57

- (1) Krama Desane sami patut sareng ngawas nitenin katuntun olih Prajurune, mangda sehanan Yadnya, sane kawentenang kaicen pamuput olih Pandita utawi Sajana (Pemangku sakeluwire), anut dudonan kadi kawenangannya soang² manut dresta
- (2) Prade wenten ngelempasin, bilih² sane pastika nyumuka, Prajurune wenang ngalangin utawi ngurungang Yadnya inucap, prade katelanjur, Yadnya saha phala–wasanannya sinaggeh tan wenten sah
- (3) Sang ngelompasin utawi dustanyane patut katiwakin pamidanda olih Prajuru Agung alit manut dosane
- (4) Prade sang katiwakan tan manut ring pemutus prajuru, wenang nunas bawos ring sang rumawos (Parisada/Pemerintah), sane patut ngicenin pemutus pamekas, tan wicaranan muwah.

Palet 3

Indik Pitra Yadnya

Pawos 58

- (1) Sang pacang ngangge tunon/setra, patut, nunas bebebaskan ring Bendesa Adat, saha tatane ngangge manut kadi dresta miwah piduduh Prajuru inucap, nenten pisan kelugra menderu utawi nunjel sawa/awak²an sawa ring karang pahumahan.
- (2) Krama Desane sami patut nilenin, mangda sehananing letuh setrene tan weten ngelalan/kebakte ke Desa pekraman, bilih² ke Kahyangan².
- (3) Prade sawane sane pacang ketunjel utawi ketanem ring setra boya sawan Krama Desa, patut nawur penanjung batu/ panukun–setra agung alit manut perarem.

- (4) Tan kelugra nanem utawi nunjel sawan wong tan megama Hindu ring setra Desa Adat Kepaon.

Pawos 59

- (1) Krama Desa pacang atiwa2, patut nunas bebebaskan ring Bendesa Adat
(2) Prajuru inucap nitenin tur nuntun mangda Yadnya punika tinas, tan nyatulin kasukertan Desa, pamekas tan wenten nyepungin kasucian Desa utawi Kahyangan
(3) Pekaryan atiwa2 utawi ngupakare sawa patut papeserah ring Banjar
(4) Banjare sukerta nyanggra, utawi ngawehin bebebaskan manut awig- awig Banjar
(5) Pemargin nganter sawe mangda dabdad tur alon

Pawos 60

- (1) Pemendeman miwah penunjelan sawo tan kawenangan nemoning :
Tilem, Purnama, Kajeng kliwon, Pagerwesi, Saraswati, Galungan, Tahur Kesanga, Nyepi, tur Pujawali ring Kahyangan Desa;
Taler tan kelugra mekirim bangke
(2) Kecuntakan/sebelan Banjar utawi Desa kemargiang selamin ipun 3 rahina keduluran antuk prassita durmangala.
(3) Kecuntakam/sebelan sang madruwe layon sanistane 7 rahina, selamin ipun 12 rahina

Palet 4

Indik Manusa Yadnya

Pawos 61

- (1) Manusa Yadnya inggih punika upakara-upakara dharmaning manusa ngawit saking patemoning kama petak kelawan kama bang sejeroning garba (wasuk) ibiang ngantos lampus riwekas
(2) Upakara, kadi ring ajeng madudonan kadi ring sor ;
1. Megedong2an duk pengerempinin ibiang (yusa bobotan 3 – 4 sasih)
2. Duk sang kamereka (rare) wawu medal
3. Kepus odel (puser)
4. Ngelepas haon (risampune rare meyusa 12 rahina)

5. Akambuhan (42 rahina)
 6. Tigang sasih (nyambutu)
 7. Pawetuan risampun 6 sasih
 8. Ngempugin rikala wswu tumbuh untu
 9. Mekupak/meketur upakara sesayut pangerti suara
 10. Mungghah dehe–teruna (ngeraja wadone, ngembakin lanange).
 11. Mapandes/metatah
 12. Mawiwaha/madengen–dengen ring pagrihastane
 13. Mawinten, nunas panugrahan Sang Hyang Aji Saraswati
- (3) Upacara–upacara soang–soang ring ajeng nista, madia, utama nganutin Sastra agama miwah dresta maka buatan Desa drestane ngawinang sima cara pebanjaran ring Desa Kepaon

Palet 5

Indik Bhuta Yadnya

(Kasucian Desa)

Pawos 62

- (1) Prajuru nuntun I Krama ngelaksanayang upakara pecaruan ring soang–soang pumahan nemoning Tilem sasih Keenem, mwah Kajeng kliwon Wudan (wuku pujut)
- (2) Taler upakara Caru Tahur Kesange mangda kelaksanayang ring Desa, Banjar, miwah ring soang–soang pumahan nemoning Tilem Kesange
- (3) Upakara pecaruan inucaping ajeng kelaksanayang agung–alit anutang ring kewentanane.

Pawos 63

- (1) Prajuru nuntun tur nabdakang mangda Desene presiadha trepti tur sipeng ring Nyepi, tur Brataning sesepen mangda keajegang
- (2) Brataning sesepen inucaping ajeng luwire :
 1. Amati geni
 2. Amati karya
 3. Amati lelangon
 4. Amati lelungan
- (3) Sejabaning wenten penindik sewosan (saksi , madruwe oka alit, 1sp), sehanan warga Desa patut seturut ninutin Brataning Sesepen inucap ring ajeng.

Pawos 64

- (1) Prajuru tan maren nuntun I Krama mangda kasucian Desane sidha ajeg.
- (2) Sane patut katiteninsehanan pemargine nyapa–krama sane sinanggeh diskereta miwah ngaletihin desa upami :
 1. Salah – timpal (jatma masanggama ring wewalungan)
 2. Gamia–gemana sane katelanjur
 3. Panguman-panguman ring sabha
 4. Miwah sehanan sane sinanggeh ngaletihin manut linging Agama.
- (3) Sang kacihnan malaksana kadi ring ajeng, patut kasisipang, mamarisuddha Desa sapatutnia

SARGA V

SUKERTA TATA PAWONGAN

Palet 1

Indik Pawiwahan

Pawos 65

- (1) Pawiwahan sane kapatutang ring Desa Adat Kapaon inggih punika patemoning purusa lan predana melarapan patunggalan kayun suka–cita maduluran upasaksi sekala kelawan niskala.
- (2) Pawiwahan arep ring warga boya wiwitan Agama Hindu patut kadulurin antuk upakara sanistannia penyambutan.

Pawos 66

- (1) Sinalih tunggil krama pacang ngawarangan kulawergannya patut masadok ring Bendesa Adat miwah Kelihan Banjarnya sanistane 3 rahina sehanan dewasa pawarangane/pawiwahan.
- (2) Prajuru2 inucap patut majitetesin pawarangan punika, prade sampan manut ring drestaning pawarangan, kaicen pasayuban sepatut nia
- (3) Prade tan manut, Prajuru2 ngutsahayang ngicenin panuntun larapan pemargine siddha manut tata–cara
- (4) Yan pawarangan inucap lempas ring kakecap agama (upami Gamia–gemana) sane sinanggeh ngawanang terak jagat, Prajuru2 punika patut ngurungang pawarangane tur malasang lanang-wadon inucap

- (5) Tata sulur pawarangan inucap mangda taler nganutin Undang2 Penegarane No. 1 warsa 1974 saha P.P.ho. 9 warsa 1975 miwah pasuwaran Gubernur Kepala Daerah Propinsi Bali.

Pawos 67

- (1) Prade panureksan ring ajeng nyiknayang pawarangan sampun manut ring drestane, upakarannya dados kelanturang
- (2) Ring panemayan upkara widi-wedananya. Prajuru inucap patut nodya maka saksi utama kesarengan antuk Kelihan Dinas (Kepala Dusun)
- (3) Prajuru2 saksi punika patut nitenin antuk ilikita indik sulur pemargin pawaragane, bilih2 yaning wenten indik sane mabuat, upami bebaktan tetatadan, jiwadanan sang pradana, sulur Purusa, Pradana lsp.
- (4) Kelihan Banjare digelis nyuratang pawarangan inucap ring ilikitannya nyiarang ring Paruman Banjar kapungkur.

Pawos 68

- (1) Sinalih tunggiling krama yan wenten kulawargannyane istri/lanang kawarangan sangkaning kalilayeng (ngerorod/ngerangkat, kapinang utawi kejangkepang), maletan aselid patut mesadok ring Kelihan Banjarnya
- (2) I Kelihan nyuarayang kulkul tabuh telu 2 tulud

Pawos 69

- (1) Kramane sane nampi wang ngerorod, patut pramangkin mesadok ring Kelihan Banjarnya.
- (2) I Kelihan patut digelis nurok a tur netes sang ngerorod, maka buatan marityaksayang manut utawi singgal pemargine ring drestane.
- (3) Bilih pemargine sampun nepek ring dresta, sang ngerorod miwah sane nampi polih pamikukuh pesayuban Banjar minakadi Kelihan/Prajuru2
- (4) Prade pemargine tan mannt ring dresta, I Kelihan patut digelis melasang, sang kinira-kira katetehan kawehin pesayuban ring Jeron Kelihane.
- (5) I Kelihan digelis patut ngutsahayang mitahuwirang sang ketetehan punika, Prade linggih nyane doh, dura desa/dura kecamatan, utsahane katur ring sang rumawos (Prebeker/Camat) manut dudonan
- (6) Sang mami-seka, sesampune kaparitetes wasta kalih Umahnyane, ketundung saking wewidangan Banjar inucap.

- (7) Krama sane nampi patut katetos katureksa, manut ring prakretinyane, yan saruron ring corah/nyarengin misekayang, wenang danda agung alit manut pamutus Kelihan tapakang ring Perarem.

Pawos 70

- (1) Sang maseserep sane pacang netes pangerorodan, patut masadok tur nunas panuntun ring Kelihan Banjar. I Kelihan patut nureksa netesang seserep punika jati tan jatinnya patut pernah wirang sang ngerorod.
- (2) Yan linggihnyane jati² pernah wirang, I Kelihan patut digelis ngenter seserep punika kaumah genah sang ngerorod.
- (3) Sang/maseserep patut tinut ring sapituduh Kelihan nganin tata-netes-pengororodan luwire :
1. Ngeranjing kaumah inucap tan langkungan ring 2 diri
 2. Tan kengin m akta senjata gegawan sakeluwire
 3. Tan kengin matingkah kalih mebawos purusnya nantang-nantang.
- (4) Senapeke, I Kelihan patut midabdabin mangda tata-cara panetesane trepti, makabuatan mangda anake istri sane ngerangkat jati² polih nerangan idepnyane sebeb, ipun. Wirang seserep mangda polih mireng ucapan anake istri punika. Luwir pidabdabe :
1. Anake istri kagenahang ngeraga, tan dados anak sewos ngenampekin prade kirang ring 3 depa tur tinas ring inange.
 2. I Kelihan muntun-nulurang, mangda sang maseserep polih mataken ring sang istri punika.
 3. I Kelihan nyumakutayang pamekas ring sang istri, mungwing dane pacang ngicenin pesayuban manut ring daging idep sang istri.
 4. Yan pada arsa pengerorodne sang maseserep pacang katulak : yan sangkaning pepaksan, sang lanang pacang katiwakan pamidanda/katundung
 5. Pamupute I Kelihan dumugi melaksana anut ring parautus idep anake istri inucap.

Palet 2

Indik Palas Merabian

Pawos 71

- (1) Sang palas marabian, patut masadok ring Kelihan Banjarnya.
- (2) Pasadok ring ajeng kadulurin antuk keterangan pastika, nganinin separindik palasnyane, upami indik pah2an guna- kaya, tataning ngupadi okannya bobotan kalih sakeluwiring pemutus iketan alaki rabi.
- (3) Palas parabian sane patut kesadokang inucaping ajeng, inggih punika palase sane pastika sampun puput-bawos, yadiastu sangkaning sami2 lila-legawa, utawi sangkaning pamutusing pawicaran.
- (4) Prade sane kasadokang durung merupa kapalasan sane pastika, puput, Kelihan Banjare patut ngicanin penuntun mangda sulur/bawos palase kapuputang rihin.
- (5) Palas perabiane sami patut kadulurin antuk upakara saha widhi-wedana Mesamsam ring Pura Desa/Bale Agung, manut ring kekecap aji Agama.
- (6) Kelihan Banjare ngunggahang ring panglikita saha nyiarang ring paruman kapalasan punika.
- (7) Pemargine ring ajeng presia kemargiang risampun medasar ilikita patra (vonis) saking Pengadilan

Palet 3

Indik Sentana

Pawos 72

- (1) Yan wenten Krama madruwe putra, masengker tigang rahina saking embasnyane patut mesadok ring Kelihan Banjarnya.
- (2) I Kelihan ngunggahang sang embas punika ring ilikitan Banjar saha nyuarayang kulkul tabuh 3 telung tulud.
- (3) Krama sane madruwe putra inucap nunasang ring sang ngawewenang mangda presidha polih ilikita putra sejati (akte kelahiran).

Pawos 73

- (1) Sinalih tunggil Krama yan pacang ngidih sentana, patut mesadok ring Kelihan Banjarnya, senistane, asasih (35 rahina) sabanen dewasa paperasan.
- (2) Kelihan inucap patut nyiarang ring Banjar, saha ngaturang ring Bendesa Adat mangda kasiarang ring wewidangan desane.

- (3) Sang rumasa keberatan ring pamerasan punika, senistane masengker 1 wuku sabenen dewasa pamerasan, patut nunas bawos ring Bendesa Adat.
- (4) Bendesa Adat digelis mawosin saha ngicenin pemutus bawos, tepe kang ring sastra miwah drestane sewosan.

Pawos 74

- (1) Yan sulur tata pemerasane sampun manut, Kelihan Banjar ngicen pasayuban, larapan upakara widhi-wedana siddha kelaksanayang.
- (2) Ring panemaya upakarene, Kelihan' Banjar miwah Bendesa Adate patut nodya sinanggeh saksi utama.
- (3) Sewusan upakara, Kelihan Banjare digelis nyuratan pamerasan inucap ring iliktannya miwah nyiarang ring sangkepan kapungkur.
- (4) Kala nyaksinin upakarane, pamekas kala ngunggahang ring ilikita, patut pastika wenten utawi tan wentene brana sekeluwire sane sinanggeh "Pamerasan".
- (5) Krama sane meras patut nunasang ring sang ngawe-wenang mangda presidha polih ilikita putra (akte pemerasan).

Pawos 75

- (1) Prade sulur pemerasane tan manut ring drestane, Kelihan Banjare patut ngandeg sang pacang mekarya saha ngicenin tuntunan mangda kaputusan rihin bebawos, sulur utawi wicaranya.
- (2) Panglaksanane kapungkur anut ring pamutus inucap.

Palet 4

Indik Warisan

Pawos 76

- (1) Warisan inggih punika tetamian arta-brana, ayah2an, miwah utang-piutang saking keluhuran, arep ring turunannya.
- (2) Sane pastika sinanggeh warisan luwire :
 1. Pura, Dadia, Paibon, Pemerajan 1sp. saha pelabannya (Duwe-tengah).
 2. Pengunakayan, tetatadan, jiwa-dana 1sp.
 3. Utang-piutang, saha sakeluwir ayah2an miwah tetegenan.
- (3) Pengwarisan ring Desa Adat Kepaon nganutin pancer kepurusan.

Pawos 77

- (1) Sang pastika wenang tur patut ngwarisin (ahli-waris) luwire :
 1. Preti santana purusa
 2. Santana rajeg
 3. Sanatan paperasan lanang/wadon.
- (2) Prade tan wenten . ahli waris kadi Kecape ring ajeng, sane patut ngewarisin inggih punika :
 1. Turunan purusa pernah ngunggahang, luwire : rerama, rerama misan, rerama mindon.
 2. Turunan purusa pernah kesamping, luwire ; keponakan, Keponakan misan, keponakan mindon.
- (3) Santana sane metu boya sangkaning pawiwahan sane sinanggeh sah, ngewaris saking ibiang kemon.
- (4) Swadharrnaning ahli waris :
 1. Nerima saha ngutsahayang tetamian pahan saking keluhurannya.
 2. Melihara sanggah, Paibon, Dadia, Pura 1sp. tur ngelaksanin upacarannya.
 3. Nyelidihin ayah2an Pewaris
 4. Ngabenan Pewaris saha ngelanturang upacara ring pitra.
 5. Nawurin hutang- utang Pewaris.
 6. Miwah sane sewosan manut dresta.

Pawos 78

- (1) Pengepahan warisan arta-brana patut kelaksanayang sesampun:
 1. Kelaksanayang upacara pitra yadnya Pewaris.
 2. Hutaug2 Pewaris buntas ketahur.
- (2) Yening ring sejeroning kula warga wenten ahli waris langkungan ring adiri patut :
 1. Kawentenan paigum indik pengepahan warisan inucap.
 2. Yaning tan kamolihang paingkup bawos ring paigum inucap, patut katunasang tetimbangan ring Kerta Desa.
 3. Yaning taler tan kemolihang paingkup bawos patut parindikan punika kesukserahang ring sang rumawos (Pengadilan Negeri).
- (3) Sinalih tunggil sang patut ngewarisan presidha tan polih pahan prade :
 1. Matilar/mengentos saking Agama Hindu.
 2. Alpaka Guru Rupaka.

3. Tan tinut ring swadharmaning ahli waris.
 4. Santana rajeg niwah santana nyeburin ninggal kedaton.
- (4) Sang tan patut ngewaris nanging wenang muponin warisan keluhurannya luwire :
1. Santana luh sane durung kesah mewiwaha
 2. Balu luh wiadin balu muani nyeburin
 3. Sang mulih dahe utawi teruna.

Pawos 79

Pewaris, rikala maurip, kengin mapeweweh :

1. Jiwa dana miwah tetatadan/bekel arep ring pianak sane kesah mewiwaha.
2. Pedum pamong miwah pamupon hasil warisan arep ring ahli waris.

Pawos 80

- (1) Prade wenten warisan keputungan, sang Prajuru Desa wenang mawosin (nureksa sila²/ sulur pakeluwargan) tur nibakang ring ahli waris purusa.
- (2) Yan tan wenten ahli waris kadi kecape ring ajeng (1) kengin ketibakang ring wadene
- (3) Prade taler tan wenten kadi kecape ring ajeng (2), ketibakang sekama–kama sakewenten raangda petunggalan Desa Adat Kepaon tur magama Hindu

SARGA VI

WICARA LAN PAMIDAND A

Palet 1

Indik Wicara

Pawos 81

- (1) Sane wenang mawosin/mutusang wicara ring Desa Luwire :
 1. Kelihan Banjar, prada sang mewicara sami² patunggalan bebanjaran
 2. Bendesa Adat, prade sang mewicara masewosan bebanjarannya.
- (2) Prade sang mewicara tan wenten cumpu ring Kelihan Banjar, wenang nunas bawos bebandingan ring Bendesa Adat.
- (3) Pemutus Bendesa Adat arep ring wicara inucaping ajeng (2), sinanggeh wesananing bebawosan ring Desa.

Pawos 82

- (1) Sehanan wicara sane mawiwit kacorahan saka luwire, miwah sinanggeh nungkasin daging Awig-awig, Pasuara miwah Perarem Desa utawi Banjar, patut raris kebawosan tan nyantosin pesadok.
- (2) Sejaba wicara kadi ring ajeng, patut nyantosin pesadok sang nunas bawos

Pawos 83

- (1) Sehanan wicara patut ketepasin jantos pastika janten iwang-patutnya melarapan antuk : Tri-pramana (Bukti, Saksi miwah ilikita) .
- (2) Pmutuse patut tan maren nepek ring catur dresta (Sastra, Purwa, Loka miwah Desa drestane).
- (3) Sehanan Pamutus patut tan maren ngupadi :
 1. Mangda warga-desane sayan pastika uning ring wewatasan iwang patut e.
 2. Mangda sang kawon, tatas uning ring kaiwangan deweknya.
 3. Sang molih tan maren katuntun mangda sarapun bas nginggilang kepatutannya, lila legawa nyampura sang sisip.
 4. Nyasap bibit2 pepinehe mamusuh2an.

Pawos 84

- (1) Bendesa Adat patut nunasang pematut ring sang rumawos, prade wenten warga desa amandel ring pmutusnya, bilih2 yang punika sinanggeh ngawanang duskretan Besa.
- (2) Warga Desa sane tan cumpu ring pmutus Bendesa Adat wenang nunas bebandingan ring pamidabdab padatan ring Kecamatan jantos ke Propinsi Bali (B.P.P.L.A. – M.P.P.L.A).

Palet 2

Indik Pamidanda

Pawos 85

- (1) Desa utawi Banjare wenang niwakang pamidanda ring Warga desane sane sisip.
- (2) Paniwak inucap kelaksahayahg ulih Bendesa Adat utawi Kelihan Banjar nungga nunggal manut dudonan.
- (3) Bacakan pamidandane luwire :
 1. Pengaksama ring ajeng Banjar/Desa.

2. Ayah panukun kasisipan.
3. Denda Arta
4. Panikel2 urunan utawi panikel dedandan
5. Upakara penyangaskara.
6. Kasepekang.
7. Kanorayang/kawusang me-Krama.

Pawos 86

- (1) Pamidandane sane katiwakang patut manut ring Awig-awig, Pasuara, Perarem utawi dresta miwah Agama, miwah adugg ring kasisipane.
- (2) Agung alit pamidandane sane katiwakang masorsingih maut ring kasisipane.
- (3) Jinah utawi raja brana pamidandane ngaranjing dados druwen Banjar utawi Desa manut dudonan

Pawos 87

- (1) Krama sane langkungan ring tigang sasih amandel utawi negungin urunan, miwah dadandan wenang kerampag.
- (2) Tata-carane ngerampag patut, tan mari kadi ring sor.
 1. Kelaksanayang ulih Kelihan Banjar, kesarengan Krama pinaka saksi seakuweh 3 diri.
 2. Sang kerampag tan dados ngalangi sang ngerampag, saha tan maren sareng nyaksinin pemargin rerampagane.
 3. Sang ngerampag sangkaning darsana ngambil barang2 rerampagan : akehnyane manut ring agung alit utang I Krama. Utawi nyawenin tanam tuwuh (tetangunan) sane kerampag.
 4. Kelihan Banjar miteketang mangda barang rerampagane gelis ketebas masangker 9 rahina ring 10 rahinane pacang kelelang.
- (3) Rerampagane kesangkerin, mangda sampunang jantos :
 1. Nganinin saluwir barang sane patut inggilang manut Agama miwah dresta.
 2. Ngicalang cihna kemanusan sang kerampag.
 3. Mademang usaha pengupa jiwa sang kerampag.

SARGA VII
NGUWAN-NGUWUNIN – AWIG-AWIG

Pawos 83

- (1) Antuk pekarsan Krama Desa, Awig-awig Desa Adat Kepaon puniki kengin keuwah-uwahin manut kewentenan Desane.
- (2) Nguwah-nguwahin Awig-awig inucaping ajeng kelaksanayang antuk paruman Desa.
- (3) Sehanan pemutus bawos ring sejeroning nguwah-nguwahin Awig-awig puniki keutsahayang mangda medasar antuk suara gilik-seguluk (mufakat).

Pawos 89

- (1) Paruman indik nguwah-nguwahin Awig-awig puniki kemedalang olih Bendesa Adat.
- (2) Paruman kadi kecape ring ajeng taler patut kewentenang prade kawidi olih Kelihan Banjar senistane sareng tigang diri pinaka wakil soang-soang banjarnya.

SARGA VIII
P E M U P U T

Pawos 90

- (1) Awig-awig puniki kewastanin awig-awig Desa Adat Kepaon.
- (2) Awig-Awig puniki kemargiang ngawit kerareman.

Pawos 91

- (1) Bendesa Adat kala ngemargiang sedaging awig-awig miwah utsahan Desa, patut tan maren :
 1. Seeloan miwah mawirasa ring sehanan Prayogya sane taler ngawiwenang warga-Desane, upami Perebikel miwah Pekaseh
 2. Ngewentenang galah pengala-Desa mangda warga Desane polih ngupadi pengupa jiwa, nincapang pengerawuh miwah utsahan neri-neri sewosan.
- (2) Sakeluwiring sane wenten sederengnia patut keanutang ring sedaging Awig-awig puniki.

- (3) Sakeluwiring sane durung kebawos sarga ring Awig-awig puniki patut kemargiang manut cara sane sampun katah memargi kadulurin antuk pararem-pararem.

Pawos 92

- (1) Awig-awig puniki kararemin duk rahina Saniscara Umanis, Wara Watugunung, tanggal 13, casih Jesta icaka 1906, tanggal Masehi 14 April 1984 magenah ring Pura Desa Adat Kepaon.
- (2) Awig-awig puniki kelingga tangani antuk Bendesa Adat kesarengin antuk Kelihan-kelihan Banjar saha kesaksinin antuk kepala-kepala Dusun sewewidangan Desa Adat Kepaon miwah Perhekel Desa Pemogan.
- (3) Luwir sang ngelingga tanganin :
1. Kepertama, Prajuru Desa Adat Kepaon ;

a. Bendesa Adat Kepaon,

Drs. I Gede Sadia

b. Kelihan Br. Dalem,

c. Kelihan Br. Dalem Kesumasari,

(I Gst. Kt. Mertha)

(I Made Mundri)

d. Kelihan Br. Jaba Tengah,

e. Kelihan Br. Jaba Jati,

(I Wayan Dugul)

(I Made Punia)

f. Kelihan Br. Dukuh Tangkas,

g. Kelihan Br. Sakah,

(I Nyoman Cindra)

(I Bagus Made Wita)

h. Kelihan Br. Rangkansari,

i. Kelihan Br. Kajeng,

(I Ketut Kaca)

(I Nyoman Puja)

2. Kaping kalih saksi – saksi :

a. Perbekel Desa Pemogan,

(I Ketut Runa)

b. Kepala Dusun Dalem,

c. Kepala Dusun Dalem Kesumasari,

(I Gst. Md. Regig)

(I Made Rugig)

d. Kepala Dusun Jaba Tengah,

e. Kepala Dusun Jaba Jati,

(I Ketut Darma)

(I Made Labor)

f. Kepala Dusun Dukuh Tangkas,

g. Kepala Dusun Sakah,

(I Nyoman Kadya)

(I Gst. Made Kentra)

h. Kepala Dusun Rangkansari,

i. Kepala Dusun Kajeng,

(I Nyoman Kartha)

(I Gst. Ketut Adi)

Om, Canti, Canti, Canti Om

----sys----